

## 2 Pita Pita letawa natawa sumanailala mampo girumalena

**1** Ne Saimon Pita Iesu Keriso mebaawaida nolawa dewalala ita aposeliwa leta ema girumantedina. Iesu Keriso no Godimba ita Inawamba, me mida dodomanaida, no sumanaimba uwatauwa neneno wadatana. Ne e sumanai sosona, mida sumanai uwatauwa ema no wadatana ruawa deawaa wadalana manlawo girumantedina.

**2** E God ita Iesu Keriso no Tatamba atendewamona bedewe mo nuawadawadau amonawa euwa ita wanwan euda obasa e bedelawo inilepie debamaidalepi. Ne auwana ema, niapo!

*God apawa no baimba ipawanatasataa gagalowa*

**3** Iesu Keriso me meba sapawaida ita nuaeuwa mampe no apanen. No me atensatana bedewe me God mukawa wadena mampee no dima wanwan dodomana kakaiwaida wampona baiwa menanedia uduudu nenен.

**4** Inta ema bedewe me amonawa uwataubu debamauida sauawalena no nenен. Ita no God amonawa ebu ema mampoe no tawo ewanuauwa kadinedia etaiate nonete God inawawaida bedewentate me inainambaida ruawantata.

**5** Iesu Keriso nitu uduudu ema no baimba dewasana baiwa badowa nolaitane e sumanaila wadalana osowe dewa euda ituna. Tane dewa euda osowe e God ateitana atemba ituna. **6** E God ateitena osowe eba onioniadewaitana dewawa ituna. Ema osowe God awa akasalala

ituna. God awa akasalala osowe God sawaitana dewawa ituna. <sup>7</sup> Ema osowe sumanai sosola saumone euda dewasana dewawa ituna. Ita ema osowe dewa euwa dea debamawaida, sa ipa nuawadawada ituna. <sup>8</sup> **Dewa eubu ema uduudu wadaitumono bedelawo inintopue debamaid-antopu!** Epe dewaitonuna e Tatamba Iesu Keriso atensalana bedewe God nolawa de-wasanadewaitane, ita do wanwanla bedewe euda ipuipua segaitana baiwa. <sup>9</sup> Apana mida dewa eubu ema mai wadape mampesapona, sa ipa me emawa gapugapulen, mai sala ewepide-walepia rua, dia. Do me nuawa awawalen me kadiwa bauta dewasana apa God sinienauben.

<sup>10</sup> Sumanai sosona, e sumanaila ipuipua segalepia baiwa badowa nolaitane God apawa ita sonabawa e baila saisaisane ipawanasana. E epe dewaitana sumanaila bedewe mai omena rua, dia. <sup>11</sup> Inta ema bedewe **Tatamba ita Inawamba Iesu Keriso me gonaawa winakasalala duwa moawa nuaeum debama maurala do wadepiaubepi e odana baiwa.**

<sup>12</sup> Ne atenten e dewa ema uduudu umanawa ateitene ita ulaipa waeuwa e etale wadalana bedewe badowa eneilana. Tane ne ideita e dialepino dewa ema insenuna. <sup>13</sup> Ne ete ema bedewe inawaa wainedinawo ne insedina euda ipa ne e epe dialepino insaisala sanaalempo insenuna baiwa. <sup>14</sup> Ne walama kerauda os, Tatamba Iesu Keriso ne bauta sabamo dianena rua, bonteape ete ema ape rua bedewe wainedina itupe epaa baiwantedina. Sa baiwa ne gagalona ema wadina. <sup>15</sup> Ne badowa nolantepine ne bon-teape elepe anteapo aupanawo e ideita dima ne waeuwalena insenune wanlempa.

*Aposel benemau badowa winede*

<sup>16</sup> Ne dima wadina e insamonuna, ipawa no Tatamba Iesu Keriso sapawaida emamboido ewatana, ita Iesu wiwisa mukawa do umanawa e dialetana. Tane no mai apanaida dudunau waeuwa ruawantepe gagalowantepona, dia.

<sup>17</sup> <sup>✧</sup>Mamamba God sapawaida bedewe wandia aiawa Iesu Keriso mampe wan, ita me ebowa debamasane sapawaida wanedie wane wanase,

**“Ema ipa ne Otonaida, ne nuawadawadasadina. Me nuaeu debama ne nedio wainedina.”**

<sup>18</sup> Walama sawo no Iesu do wadi kakaiwa osowe eneite nuba asimboido God aiawa ema wano etatana.

<sup>19</sup> Aia dainea no wadiwa etatana sumanai-wantitana, tane peroweta gagalou bedewe no insaisamba badowaida ituitana. Sa baiwa e peroweta aiau deaitopa asisudewaitonuna! **Peroweta aiau ipa bola dubawa bedewe siwa idie sapa wadia rua walama ande baiwa. Tane ando walama pundepio Iesu Keriso wiwisa bedewe me sapawa walama kiporawa Tauragaraga ruawa e nualawo sapa wapi.**

<sup>20</sup> Tane gagalo ema do etane insenadewaitana. Ema epe: Mai mida da peroweta aiau ipawaida buka bedewe winedia me meba insaisawa mampe wasabamosapia rua, dia. <sup>21</sup> Ipawa peroweta gagalou mai apanaida insaisawa bedewe wineipona, diaida. Tane mo Aleu kakaiwa bedeuwolene waeuwamono God umanawa benemanton.

---

<sup>✧</sup> **1:17:** Matiu 17.1-5; Mak 9.2-7; Luk 9.28-35

**2**

<sup>1</sup> Tane peroweta lagawaau Israel apanawa bedeuwo segantona rua deawaa e bedelawo waeuwa apanawa lagawaau segantopu. Mo weregainta waeuwa lagawaau sumanai kidisapia wadeie obei. Tane do Tatamba ionoidoa mida mo malesamone inamona lagawa wai. Mo epe dewantoia baiwa God mo matangelamopio tauwadea kadiwaida donsapu. <sup>2</sup> Tane apana uara mo dewau malawala wawentopu. Ita mo eueuwau kadiwa baiwa apana wankoalala ulaipa waeuwa intawa wakadisasapu. <sup>3</sup> Apana ne umanau wadina dewau ipa ema epe: **Mo nitu da e manlawoa anatepu a baiwa waeuwa lagawa mo muba insaisauwo waio nosede. Mo nuakadiu apanawa oniamodie anubu wande, me mai nuaawawamoipona, dia.**

<sup>4</sup> Ensel isiwa do insamona: Mo kadi dewasaiena baiwa God mo bola iwimpuiwimpua bedewe waaubamono antone waimoia, ideita kotu walamawa wisepio kotuntopu. <sup>5</sup> <sup>✡</sup>Tane ema do e etale ateiten: Mapoido God tawo uduudu kadiidasane abaia debamaia wanaubeno nosene apana kadi dewalala God sawasiawai uduudu awanamontuwan. **God mai mida da abaia sa bedewe inasapona, dia.** Tane Noa ita me apanawa uduudu <sup>7</sup> os do abaia bedewe inamon. **Noa, me ipa God intawa dodomana gagallowala apanawa.** <sup>6</sup> <sup>✡</sup>God bola debamau nata Sodom ita Gomora matangelam-one ia mampe sutuiamon eueuwa baiwa. Ando God apana mai me sawantoipona mampo kotu

---

<sup>✡</sup> **2:5:** Bumpai 6.1–7.24    <sup>✡</sup> **2:6:** Bumpai 19.24

ipa deawaa dewasapi. <sup>7</sup> <sup>✡</sup>Insenadewaitana, **God Lot os Sodom bedewe inasan. Me ipa apna euwa dodomana wandie, ita Sodom apnawa nina kadiwa dewalala me badowa rubusane ituaisisaie.** <sup>8</sup> Tane Lot, apna euwa dodomana, mo bedeuwo wandie mo dewau kadiwa walama ruawantoie dewasaio ewedie etedia baiwa nuawa pokaida wan.

<sup>9</sup> Eueuwa ema uduudu sabamosade **Tatamba God me sawantoia apnawa poka bedewe saumopie inamopia intawa atembaida.** Tane do kadi dewalala apnawa matangelamopia intawa me atemba. Ita apna sa teamono tauma waimoi kotu walamawa wisepia baiwa. <sup>10</sup> Gagalo ema ipa debamaia mo mida ete miramirasampa insaisawa dewasaie ita God aiawa dabuasaia apnawa mampo. Apna ema malasiawaia badowa eneie muba asou waie, ita mo mida uboo muka wadane waimoia mo mai sauntoipona di wakadisamoi. <sup>11</sup> Mo ipa apnaida os mukau kerauda, tane epe dewantoi. Tane ensel mukawaauida mai uboo muka wadane waimoia aiau kadiwa mampe God danawe wawumoipona, dia. Tane laga waeuwa apnawa malasiawaia epe dewasai.

<sup>12</sup> Waeuwa lagawaa apnawa ne umanau wadina dima mo mai atentoipona di wakadisasai. Mo ipa pue dobinoa ruau ita insaisau wisedia rua inseie antoi. Pue dobinoa bomompe namompa os baiwa muntoie waimoi. Tane laga apnawa pue ema ruau do kadi donsapue <sup>13</sup> poka dewasaia rua sipoa pokawaa etapu. Mo ete nuaeuwa walama sapawa bedewe sabamo dewasaie nuaeuwantoi.

---

<sup>✡</sup> 2:7: Bumpai 19.1-16

E bedelawo mo ipa ia pimba ba mira rua. Ita mo laga mampe bedelawontoie e nanala bedewe narebasasai. <sup>14</sup> Mo emau nina dewawa os baiwaleidie, ita kadi dewasaie mai pokamoipono eipona, dia. Tane osowe kainokaino dewasampa menamode. Mo apama sumanaibu oauara baimoio kadi bedewe antoi. Ita mo nuau bedewe anaanata insaisawa atenidanton. God nuakadiwa ipa mo osouwo winede! <sup>15</sup> ♫Apana sa inta dodomana awa ene nambe antone apama ebowa Beoa otopa Balaam wawentoi, me mida dewa kadiwa baiwa manewa wadena apanawa. <sup>16</sup> Balaam dewawa kadiwa baiwa pue donki me amboitusan. Pue sa ipa mai gagalola, tane apapanaida aiawa rua gagalolene ita peroweta Balaam wanituden me oo dewawa epi.

<sup>17</sup> Apana lagawaau ema ipa ewaewau abo maneу esawa akasalala rua. Tane mo ipa maneу tonalala. Do mo ewaewau ipa giou dubaleidie unu wawa baiwaleidia rua, tane lanunu suaubasadio nambe aleidio, mai unu waipe irai butasaipona, dia. Tane God mo baibu bola iwimpuiwimpua imaasano winede. <sup>18</sup> Mo asowawa mampe gagalo ipusiawaia wamoie. Ita ete ewauuwa mampe apama mida taumaida wankoalala emone sapa bedewe odeiena baimoie teinamoi. <sup>19</sup> Mo sumanailala sanaa diamoie waiase, “No waeuwamba wawetane ando mai kadiwa da e taudolepi, dia.” Tane mo muba ipa kadi dewawa taudomon. **Ne epe wadina, ipawa kadi dainea apama nanausadia, kadi sa ipa apama taudoidasadade.**

---

❖ **2:15:** Nambas 22.4-35

<sup>20</sup> Sumanailala no Tatamba ita Inawamba Iesu Keriso atentona baiwa tawo ema kadiwa bedewe ene nomone inantoiena. Tane apana ema leuntoie tawo ema kadiwa bedewentoio nanaumodia. Sa ipa mo wanwambu kadiidaleide, mai bauta waimoia rua. <sup>21</sup> Apana ema ipa Gagalo euda kakaila waeuwa dauwa etane atentone, tane dima mo wadane mamposaiena adiananasane eiena. Sa ipa mai ide! Eulepona mo inta dodomana waeuwa bauta mai atensapona. <sup>22</sup> Mo epē dewantoia bedewe dima apana waia rua segaleide: “**Elo uta endie tane aleidie leusadie nade.**” Ita do: “**Bono duadilene eulena tane osowe topa todie miramiraleide.**”

### 3

#### *Tatamba ideita wisepia gagalowa*

<sup>1</sup> Nuana sosowa, ne letana bauta girumenten, tane tauma osowe girumantedina e manlawo. Leta ema nata bedeuwo e insaisala dodomana wadana baiwa ne waninaledina. <sup>2</sup> Ne menanedia peroweta kakaibu gagalou, ita do dima Tatamba Iesu Keriso no Inawamba no dianena aposel waeuwau mampe manlawo wiseno etalana osowe insena. <sup>3</sup> <sup>◊</sup>Ema ipa gagalo debamaia e insenadewaitana: Walama ompa osowe wareuwa apanawa mo muba ete insaisawa mampe laia segantopue ita Gagalo euda wareuwasapu. <sup>4</sup> Mo wapue wapuase, “**Iesu Keriso wisepona sauawalen, tauma me naepe? No gombamba bontoienan tane tawo segalenawo ita tauma nitu uduudu deawaa**

---

<sup>◊</sup> 3:3: Iud 1.18

**winei, mai sanaaleipona, dia.**" <sup>5</sup> Mapoido God aiawa mukawa mampe uba segasan, ita do God esa mukawa mampe dewasano esa bedewe tawo segalene wisen. Tane laga waeuwa apanawa dewa ema mai inseipe sumanaiwantoipona, dia. <sup>6</sup> <sup>5</sup>Esa ipa sa deawaa tawo tontawa kidisane mitenauben. <sup>7</sup> Tane God aiawa ipa deawaa mampe uba ita tawo tauma ituno winedia ando ia iilawo kidisapia baiwa. God uba ita tawo eno winedia apuna God sawasiawaia kotu ita kadi dongsapua walamawa wisepio tauma uduudu kadilepituwapi. <sup>8</sup> <sup>5</sup>Nuana sosowa, ema do insenadewaitana: Tatamba emawe walama dea ita ena 1000 ipa deawaa, mai da daumalepona ba kampalepona, dia. Me mampe walama ema nata ipa deawaa.

<sup>9</sup> Apuna isiwa waiase, "Tatamba saualena tauwadea wisepona, tane alaleide." **Insena, Tatamba mai alaleipona, dia.** Tane e baila onionialeidie wande. **Me mai menasaipona apuna da kadi dongsapi, dia.** Tane me menasa-dia apuna uduudu **wimopue insaisau leusapue God mampe dodomanantopu.** <sup>10</sup> <sup>5</sup>Tane Tatamba wiwisa walamawa ipa poi apanawa du bedewe odepie meepia rua. Walama sawo uba moina debama do sararamepie dialepi, ita do dima uba tampe wineia ia ituiamopi. Tawo ita dima osowe winamoia do lawosantopue diaidan-topu. <sup>11</sup> Nitu ema uduudu ema epe inta ando diantopu, sa baiwa e deaitopa wanlempa. **E wan-**

<sup>5</sup> 3:5: Bumpai 1.6-9    <sup>5</sup> 3:6: Bumpai 7.11    <sup>5</sup> 3:8: Sam 90.4

<sup>5</sup> 3:10: Matiu 24.43; Luk 12.39; 1 Tesal 5.2; Gagalo 16.15

**wanla bedewe God sawaitonune kakaiwaida wanlempem God kotuwa walamawa wisepia baiwa inta ewaewaitonuna.** <sup>12</sup> E nolala euda dewasanuna mampe God walamawa ituna dewasano tauwadea wisepi. God walamawa sawo ia iilala uba ipituwapi, do nitu uduudu uba tampe wineia ia polamopio sisiwapue diantopu. <sup>13</sup> <sup>✡</sup>Tane no sumanailala uba ita tawo sanaau God saualena inta ewaewantite wainitana. Bola sanaa sa bedewe dewa euda dodomana os winamoi.

<sup>14</sup> Nuana sosowa, epe segalepia baiwa walama ema inta ewaewaitilana bedewe noladewaitonuna, Iesu Keriso wimpie e mai mira ba pin do wanlempo donlepi. Tane me wisepio nuala euwa mampe me do deaitana. <sup>15</sup> Tatamba nuawa aiaisiwa wande, mai tauwadea wisepi, sa ipawa e inta banusane inaitana baiwa. No nuamba sowa Paul God me insaisawa euda wanena bedewe deawaa girumalen e manlawo. <sup>16</sup> Paul ema umanawa me letawa uduudu bedeuwo ipa deawaa wade. Me letawa bedeuwo aia isiwa wamona no mainimbo badowa, ita mai tauwadea atentate sabamosataa rua, dia. Waeuwa sa Paul girumalena ipawaiida apava atensiawaia ita insakoalala leusatusai. Tane mo waeuwa isiwa buka bedewe girumalena mampe deawaa dewasai. Mo epe dewantoie muba God nuakadiwa wadeie mamposai, ita mo ando kadiwaida donsapu. <sup>17</sup> Tane e sosonaida dewa ema uduudu aitamana ateitena baiwa insaisala wadaaubala emodewaitonune wanlempa. Ipawa apava God anaanawa mai sawantoipona, mo lagau mampe rubusaia

---

<sup>✡</sup> 3:13: Gagalo 21.1

banlakadisalepuo sumanaila bedewe badowa  
eneilana omena baiwa. <sup>18</sup> **Tane e Tatamba Iesu  
Keriso no Inawamba nuawadawadawa amon-  
awa ita me atendewaitana atemba bedewe  
ideita initonune wanlempa.**

Me mampe ipa sapaida tauma ita ando  
winakasala! Ulaipa, amen.

**Ina Sanaa Gagalowa**  
**The New Testament in the Kanasi Language of Papua**  
**New Guinea**  
**Nupela Testamen long tokples Kanasi long Niugini**  
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 11 Nov 2022 from source files  
dated 9 Oct 2020

b27bd40e-e091-5268-bcbf-8232e1d7501a